

摘藻堂四庫全書薈要

史部

欽定四庫全書叢要

史部

唐書卷二百二十二

中上

詳校官內閣侍讀臣孫球



欽定四庫全書薈要卷五十三百六十六

史部

唐書卷二百二十二上

宋端明殿學士宋祁撰

傳第一百四十七上

南蠻

南詔或曰鶴拓曰龍尾曰苴咩曰陽劍本哀牢夷後烏蠻別種也夷語王為詔其先渠帥有六自號六詔曰蒙
騫詔越析詔浪穹詔澄賧詔施浪詔蒙舍詔兵埒不能

相君蜀諸葛亮討定之蒙舍詔在諸部南故稱南詔居永昌姚州之間鐵橋之南東距爨東南屬交趾西摩伽陀西北與吐蕃接南女王西南驃北抵益州東北際黔巫王都羊苴咩城別都曰善闡府王坐東嚮其臣有所陳以狀言而不稱臣王自稱曰元猶朕也謂其下曰昶猶卿爾也官曰坦綽曰布燮曰久贊謂之清平官所以決國事輕重猶唐宰相也曰酋望曰正酋望曰員外酋望曰大軍將曰員外猶試官也幕爽主兵琮爽主戶籍

慈爽主禮罰爽主刑勸爽主官人厥爽主工作萬爽主財用引爽主客永爽主商賈皆清平官苗望大軍將兼之爽猶言省也督爽總三省也乞託主馬祿託主牛巨託主倉廩亦清平官苗望大軍將兼之曰爽苗曰彌勤曰勤齊掌賦稅曰兵孺司掌機密大府主將曰演習副曰演覽中府主將曰繕裔副曰繕覽下府主將曰澹苗副曰澹覽小府主將曰幕撫副曰幕覽府有陀苗若管記有陀西若判官大抵如此凡調發下文書衆邑必占

其期百家有總佐一十家有治人官一萬家有都督一
凡田五畝曰雙上官授田四十雙上戶三十雙以是而
差壯者皆為戰卒有馬為騎軍人歲給韋衫袴以邑落
遠近分四軍以旗幟別四方面一將統千人四軍置一
將凡敵入境以所入面將禦之王親兵曰朱弩佉苴佉
苴韋帶也擇鄉兵為四軍羅苴子戴朱鞬鍔負犀革銅
盾而跣走險如飛百人置羅苴子統一人望苴蠻者在
蘭蒼江西男女勇捷不鞍而騎善用矛劍短甲蔽胷腹

鞬鍔皆插貓牛尾馳突若神凡兵出以望苴子前驅以
清平子弟為羽儀王左右有羽儀長八人清平官見王
不得佩劍唯羽儀長佩之為親信有六曹長曹長有功
補大軍將大軍將十二與清平官等列日議事王所出
治軍壁稱節度次補清平官有內算官代王裁處外算
官記王所處分以付六曹外則有六節度曰弄棟永昌
銀生劍川柘東麗水有二都督會川通海有十臉夷語
臉若州曰雲南臉白厓臉亦曰勃弄臉品澹臉暹川臉

蒙舍臉大釐臉亦曰史臉苴咩臉亦曰陽臉蒙秦臉大
和臉趙川臉祁鮮山之西多瘴歊地平草冬不枯自曲
靖州至滇池人水耕食蠶以柘蠶生閱二旬而蠶織錦
縑精緻大和祁鮮而西人不蠶剖波羅樹實狀若絮紐
縷而幅之覽臉井產鹽最鮮白惟王得食取足輒滅竈
昆明城諸井皆產鹽不征羣蠻食之永昌之西野桑生
石上其材上屈兩向而下植取以為弓不筋漆而利名
曰瞑弓長川諸山徃徃有金或披沙得之麗水多金甃

越睽之西多薦草產善馬世稱越睽駿始生若羔歲中
紐莎縻之飲以米潘七年可御日馳數百里王出建八
旗紫若青白旂雉翼二有旄鉞紫囊之翠蓋王母曰信
麼亦曰九麼妃曰進武信麼出亦建八旗絳旂自曹長
以降繫金佉首尚絳紫有功加錦又有功加金波羅金
波羅虎皮也功小者衿背不袖次止于衿婦人不粉黛
以蘇澤髮貴者綾錦裙襦上施錦一幅以兩股辮為鬟
髻耳綴珠貝瑟瑟虎魄女嬃婦與人亂不禁婚夕私相

送已嫁有姦者皆抵死俗以寅為正四時大抵與中國
小差膾魚寸以胡瓜椒殺和之號鵝闕吹瓢笙笙四管
酒至客前以笙推盞勸酬以繒帛及貝市易貝者大若
指十六枚為一覓師行人齎糧斗五升以二千五百人
為一營其法前傷者養治後傷者斬犁田以一牛三夫
前挽中壓後驅然專于農無貴賤皆耕不繇役人歲輸
米二斗一藝者給田二畝乃稅王蒙氏父子以名相屬
自舍老以來有譜次可考舍老生獨邏亦曰細奴邏高

宗時遣使者入朝賜錦袍細奴邏生邏盛炎邏盛炎生
炎閤武后時盛炎身入朝妻方娠生盛邏皮喜曰我又
有子雖死唐地足矣炎閤立死開元時弟盛邏皮立生
皮邏閤授特進封臺登郡王炎閤未有子時以閤羅鳳
為嗣及生子還其宗而名承閤遂不改開元末皮邏閤
逐河蠻取大和城又襲大釐城守之因城龍口夷語山
坡陀為和故謂大和以處閤羅鳳天子詔賜皮邏閤名
歸義當是時五詔徵歸義獨彊乃厚以利啖劔南節度

使王昱求合六詔為一制可歸義已并羣蠻遂破吐蕃
寢驕大入朝天子亦為加禮又以破洱蠻功馳遣中人
冊為雲南王賜錦袍金鈿帶七事於是徙治大和城天
寶初遣閣羅鳳子鳳迦異入宿衛拜鴻臚卿恩賜良異
七載歸義死閣羅鳳立襲王以其子鳳迦異為陽瓜州
刺史初安寧城有五鹽井人得煮鹽自給玄宗詔特進
何履光以兵定南詔境取安寧城及井復立馬援銅柱
乃還鮮于仲通領劔南節度使忤少方略故事南詔

嘗與妻子謁都督過雲南太守張虔陀私之多所求丐
閼羅鳳不應虔陀數詬斬之陰表其罪由是忿怨反發
兵攻虔陀殺之取姚州及小夷州凡三十二明年仲通
自將出戎舊州分二道進次曲州靖州閼羅鳳遣使者
謝罪願還所虜得自新且城姚州如不聽則歸命吐蕃
恐雲南非唐有仲通怒囚使者進薄白崖城大敗引還
閼羅鳳歛戰肉築京觀遂北臣吐蕃吐蕃以為弟夷謂
弟鍾故稱贊普鍾給金印號東帝揭碑國門明不得已

而叛嘗曰我上世世奉中國累封賞後嗣容歸之若唐
使者至可指碑澡被吾罪也會揚國忠以劔南節度當
國乃調天下兵凡十萬使侍御史李宓討之輦餉者尚
不在涉海而疫死相踵於道宓敗于大和城死者十八
亦會安祿山反閤羅鳳因之取嵩州會同軍據清溪關
以破越析梟于贈西而降尋傳驃諸國尋傳蠻者俗無
絲纊跣履榛棘不苦也射豪猪生食其肉戰以竹籠頭
如兜鍪其西有裸蠻亦曰野蠻漫散山中無君長作檻

舍以居男少女多無田農以木皮蔽形婦或十或五共
養一男子廣德初鳳迦異築柘東城諸葛亮石刻故在
文曰碑即仆蠻為漢奴夷畏誓常以石搭搭大厯十四
年閤羅鳳以鳳迦異前死立其孫異牟尋以嗣異牟尋
有智數善撫衆畧知書母李獨錦蠻女也獨錦蠻亦烏
蠻種在秦藏川南天寶中命其長為歸州刺史世與南
詔婚聘異牟尋立悉衆二十萬入寇與吐蕃并力一趨
茂州踰文川擾灌口一趨扶文掠方維白坝一侵黎雅

叩叩邾關令其下曰為我取蜀為東府工伎悉送邏娑
城歲賦一縑於是進陷城聚人率走山德宗發禁衛及
幽州軍以援東川與山南兵合大敗異牟尋衆斬首六
千級擒生捕傷甚衆顛踣厓峭且十萬異牟尋懼更徙
苴咩城築袤十五里吐蕃封為日東王然吐蕃責賦重
數悉奪其險立營候歲索兵助防異牟尋稍苦之故西
瀘令鄭回者唐官也往嵩州破為所虜閭羅鳳重其惇
儒號蠻利俾教子弟得箠撈故國中無不憚後以為清

平官說異牟尋曰中國有禮義少求責非若吐蕃怵刻
無極也今棄之復歸唐無遠戍勞利莫大此異牟尋善
之稍謀內附然未敢發亦會節度使韋臯撫諸蠻有威
惠諸蠻頗得異牟尋語白于臯時貞元四年也臯乃遣
謀者遺書吐蕃疑之因責大臣子為質異牟尋愈怨後
五年乃決策遣使者三人異道趨成都遺臯帛書曰異
牟尋世為唐臣曩緣張虔陀志在吞侮中使者至不為
澄雪舉部惶窘得生異計鮮于仲通比年舉兵故自新

無繇代祖棄背吐蕃欺孤背約神川都督論訥舌使浪
人利羅式眩惑部姓發兵無時今十二年此一忍也天
禍蕃廷降釁蕭牆太子弟兄流竄近臣橫汙皆尚結贊
陰計以行屠害平日功臣無一二在訥舌等皆冊封王
小國奏請不令上達此二忍也又遣訥舌逼城于鄙弊
邑不堪利羅式私取重賞部落皆驚此三忍也又利羅
式罵使者曰滅子之將非我其誰子所富當為我有此
四忍也今吐蕃委利羅式甲士六十侍衛因知懷惡不

謬此一難忍也吐蕃陰毒野心輒懷搏噬有如媮生實
汚辱先人辜負部落此二難忍也往退渾王為吐蕃所
害孤遺受欺西山女王見奪其位拓拔首領並蒙誅刈
僕固志忠身亦喪亡每慮一朝亦被此禍此三難忍也
往朝廷降使招撫情心無二詔函信節皆送蕃廷雖知
中夏至仁業為蕃臣吞聲無訴此四難忍也曾祖有寵
先帝後嗣率蒙襲王人知禮樂本唐風化吐蕃詐給百
情懷惡相戚異年尋願竭誠自新歸欵天子請加戍劔

南西山涇原等州安西鎮守揚兵四臨安回鶻諸國所
在侵掠使吐蕃勢分力散不能為彊此西南隅不煩天
兵可以立功云且贈臯黃金丹砂臯護送使者京師使
者奏異牟尋請歸天子為唐藩輔獻金示順革丹赤心
也德宗嘉之賜以詔書命臯遣謀往覘臯令其屬崔佐
時至羊苴咩城時吐蕃使者多在陰戒佐時衣牂柯使
者服以入佐時曰我乃唐使者安得從小夷服異牟尋
夜迎之設位陳燎佐時即宣天子意異牟尋內畏吐蕃

顧左右失色流涕再拜受命使其子閭勸及清平官與
佐時盟點蒼山載書四一藏神祠石室一沈西洱水一
置祖廟一以進天子乃發兵攻吐蕃使者殺之刻金契
以獻遣曹長段南羅趙迦寬隨佐時入朝初吐蕃與回
鶻戰殺傷甚乃調南詔萬人異牟尋欲襲吐蕃陽示寡
弱以三千人行許之即自將數萬踵後晝夜行大破吐
蕃於神川遂斷鐵橋溺死以萬計俘其五王乃遣弟湊
羅棟清平官尹仇寬等二十七人入獻地圖方物請復

號南詔帝賜賚有加拜仇寬左散騎常侍封高溪郡王
明年夏六月冊異牟尋為南詔王以祠部郎中袁滋持
節領使成都少尹龐頎副之崔佐時為判官俱文珍為
宣慰使劉幽巖為判官賜黃金印文曰貞元冊南詔印
滋至大和城異牟尋遣兄蒙細羅勿等以良馬六十迎
之金鏤玉珂兵振鐸夾路陳異牟尋金甲蒙虎皮執雙
鐸鞘執矛千人衛大象十二引于前騎軍徒軍以次列
詰旦授冊異牟尋率官屬北面立宣慰使東向冊使南

向乃讀詔冊相者引異牟尋去位跽受冊印稽首再拜
又受賜服備物退曰開元天寶中其曾祖及祖皆蒙冊
襲王自此五十年貞元皇帝洗痕錄功復賜爵命子子
孫孫永為唐臣因大會其下享使者出銀平脫馬頭盤
二謂滋曰此天寶時先君以鴻臚少卿宿衛皇帝所賜
也有笛工歌女皆垂白示滋曰此先君歸國時皇帝賜
胡部龜茲音聲二列今喪亡畧盡唯二人故在酒行異
牟尋坐奉觴茲前滋受觴曰南詔當深思祖考成業抱

忠竭誠永為西南藩屏使後嗣有以不絕也異年尋拜
曰敢不承使者所命滋還復遣清平官尹輔苗等七人
謝天子獻鐸鞘浪劍鬱刃生金瑟瑟牛黃琥珀氎紡絲
象犀越睭統倫馬鐸鞘者狀如殘刃有孔傍連出麗水
飾以金所擊無不洞夷人尤寶月以血祭之鬱刃鑄時
以毒藥并冶取迎躍如星者凡十年乃成淬以馬血以
金犀飾鐸首傷人即死浪人所鑄故亦名浪劍王所佩
者傳七世矣異年尋攻吐蕃復取昆明城以食鹽池又

破施蠻順蠻並虜其王置白崖城因定磨此蠻隸昆山
西爨故地破茫蠻掠弄棟蠻漢裳蠻以實雲南東北施
蠻者在鐵橋西北居大施朕斂尋朕男子衣繒布女分
髮直額為一髻垂後跣而衣皮順蠻本與施蠻雜居劍
共諸川咩羅皮鐸羅望既失遐川浪穹奪劍共地由是
徙鐵橋在劍朕西北四百里號劍羌磨蠻此蠻與施順
二蠻皆烏蠻種居鐵橋大婆小婆三探覽昆池等川土
多牛羊俗不類澤男女衣皮俗好飲酒歌舞茫蠻本關

南種茫其君號也或呼茫詔永昌之南有茫天連茫吐
孺大朕茫昌茫鮮茫施大抵皆其種樓居無城郭或漆
齒或金齒衣青布短袴露髀以縵布繚腰出其餘垂後
為飾婦人垂五色婆羅籠象纒如牛養以耕弄棟蠻白
蠻種也其部本居弄棟縣鄙地昔為哀州有首領為刺
史誤殺其參軍挈族北走後散居磨些江側故劔共諸
川亦有之漢裳蠻本漢人部種在鐵橋惟以明霞纏頭
餘尚同漢服十五年異牟尋謀擊吐蕃以澄川寧北等

城當寇路乃峭山深塹修戰備帝許出兵助力又請以
大臣子弟質于臯臯辭固請乃盡舍成都咸遣就學且
言昆明舊州與吐蕃接不先加兵為虜所脅反為我患
請臯圖之時唐兵比歲屯京西朔方大峙糧用南北並
攻取故地然南方轉饟稽期兵不悉集是夏虜麥不熟
疫癘仍興贊普死新君立臯揣虜未敢動乃勸異牟尋
緩舉萬全愈于速而無功今境上兵十倍往歲且行營
皆在舊州扼西瀘吐蕃路昆明弄棟可以無虞異牟尋

請期它年吐蕃大臣以歲在辰兵宜出謀襲南詔閱衆
治道將以十月圍雋州軍屯昆明凡八萬皆命一歲糧
贊普以舅攘都羅為都統遣尚乞力欺徐濫鑠屯西貢
川異牟尋與臯相聞臯命部將武免率弩士三千赴之
元榮朝以萬人屯黎州韋良金以二萬五千人屯雋州
約南詔有急皆進軍過俄準添城者南詔供饋吐蕃引
衆五萬自曩貢川分二軍攻雲南一軍自諾濟城攻雋
州異牟尋畏東蠻磨此難測懼為吐蕃鄉導欲先擊之

臯報雋州實徃來道扞蔽數州虜百計窺之故嚴兵以
守屯壁相望糧械處處有之東蠻庸敢懷貳乎異牟尋
乃檄東磨此諸蠻內糧城中不者悉燒之吐蕃顓城將
楊萬波約降事洩吐蕃以兵五千守臯將擊破之萬波
與寵官拔顓城以來徙其人二千于宿川臯將扶忠義
又取耒恭城俘繫牛羊千計贊普大將既煎讓律以兵
距卜貢川一舍而屯國師馬定德率種落出降西貢節
度監軍野多輸煎者贊普乞立贊養子當從先贊普殉

亦詣忠義降於是虜氣衰軍不振欺徐濫鑠至鐵橋南
詔毒其水人多死乃徙納川壁而待是年虜霜雪早兵
無功還期以明年吐蕃苦唐詔犄角亦不敢圖南詔臯
令免按兵舊州節級鎮守雖南詔境亦所在屯戍吐蕃
懲野戰數北乃屯三瀘水遣論安熟誘頻瀘諸蠻復城
悉攝悉攝吐蕃險要也蠻酋潛導南詔與臯部將杜毗
羅狙擊十七年春夜絕瀘破虜屯斬五百級虜保鹿危
山毗羅伏以待又戰虜大奔於時康黑衣大食等兵及

吐蕃大酋皆降獲甲二萬首又合鬼主破虜于瀘西吐蕃君長共計不得嵩州患未艾常為兩頭蠻挾唐為輕重謂南詔也會虜荐饑方葬贊普調斂煩至是大料兵率三戶出一卒虜法為大調集又聞唐兵三萬入南詔乃大懼兵戍納川故洪諾濟臘聿賫五城欲悉師出西山劔山收嵩州以絕南詔臯即上言京右諸屯宜明斥候蚤歛田邠隴焚萊可困虜入臯遣將邢毗以兵萬人屯北路趙昱萬人戍黎雅州異牟尋謂臯曰虜聲取

舊州實窺雲南請武免督軍進羊苴咩若虜不出者請
以來年二月深入時虜兵三萬攻鹽州帝以虜多詐疑
繼以大軍詔臯深鈔賊郤分虜勢臯表賊精鎧多置南
屯今向鹽夏非全軍欲掠河曲党項畜產耳俄聞虜破
麟州臯督諸將分道出或自西山或由平夷或下隴陀
和石門或徑神川納川與南詔會是時回鶻太原邠寧
涇原軍獵其北劍南東川山南兵震其東鳳翔軍當其
西蜀南詔深入克城七焚堡百五十所斬首萬級獲鎧

械十五萬圍昆明維州不能克乃班師振武靈武兵破
虜二萬涇原鳳翔軍敗虜原州惟南詔攻其腹心俘獲
最多帝遣中人尹偕慰異牟尋而吐蕃盛屯昆明神川
納川自守異牟尋比年獻方物天子禮之

唐書卷二百二十二上

唐書卷二百二十二上考證

南蠻傳上獨邏亦曰細奴邏○舊書獨邏作迦獨龐以
細奴邏為迦獨龐子未詳孰是

唐書卷二百二十二上考證

欽定四庫全書薈要卷五千三百六十七

史部

唐書卷二百二十二中

宋端明殿學士宋祁撰

列傳第一百四十七中

南蠻

元和三年異牟尋死詔太常卿武少儀持節弔祭子尋閣勸立或謂夢湊自稱驃信夷語君也改賜元和印章明年死子勸龍晟立淫肆不道上下怨疾十一年為弄

棟節度王嵯巔所殺立其弟勸利詔少府少監李銑為
冊立弔祭使勸利德嵯巔賜氏蒙封大容蠻謂兄為容
長慶三年始賜印是歲死弟豐祐立豐祐趨取善用其
下慕中國不肯連父名穆宗使京兆少尹韋審規持節
臨冊豐祐遣洪成酋趙龍些楊定竒入謝天子於是西
川節度使杜元穎治無狀障侯弛沓相蒙時大和三年
也嵯巔乃悉衆掩叩戎窟三州陷之入成都止西郭十
日慰賚居人市不擾肆將還乃掠子女工技數萬引而

南人懼自殺者不勝計救兵遂岷巖身自殿至大度河
謂華人曰此吾南境爾去國當哭衆號慟赴水死者十
三南詔自是工文織與中國埒明年上表請罪比年使
者來朝開成會昌間再至大中時李琢為安南經畧使
苛墨自私以斗鹽易一牛夷人不堪結南詔將段酋遷
陷安南都護府號白衣沒命軍南詔發朱弩佞首三千
助守然朝貢猶歲至從者多杜棕自西川入朝表無多
內蠻僭豐祐怒即慢言索質子會宣宗崩使者告哀是

時豐祐亦死坦綽酋龍立憲朝廷不弔卹又詔書乃賜故王以草具進使者而遣遂僭稱皇帝建元建極自號大禮國懿宗以其名近立宗嫌諱絕朝貢乃陷播州安南都護李鄴屯武州咸通元年為蠻所攻棄州走天子斥鄴以王寬代之明年攻邕管經略使李弘源兵少不能拒奔蠻州南詔亦引去詔殿中監段文楚為經畧使數改條約衆不悅以胡懷玉代之南詔知邊人困甚剽掠無有不入寇杜棕當國為帝謀遣使者弔祭示恩信

并詔驃信以名嫌冊命未可舉必易名乃得封帝乃命
左司郎中孟穆持節往會南詔陷嵩州穆不行安南桃
林人者居林西原七綰洞首領李由獨主之歲歲戍邊
李琢之在安南也奏罷防冬兵六千人謂由獨可當一
隊遏蠻之入蠻酋以女妻由獨子七綰洞舉附蠻王寬
不能制三年以湖南觀察使蔡襲代之發諸道兵二萬
屯守南詔憺畏不敢出會詔左庶子蔡京經制嶺南忌
襲功有所欲沮壞之乃言南方自無虞武夫倖功多聚

兵耗餽運請還戍兵惜財用襲執不可願留五千兵累表不報即極陳南詔伺隙久有十必死狀朝廷昏肆不省也京還奏得意甚復詔為宣慰安撫使即建柝廣州為嶺南東道邕州為西道以龔象藤巖為隸州乃拜京西道節度使京褊忒貪克峻條令為炮熏剗斫法下愁毒為軍中所逐走藤州矯制作攻討使印召鄉兵比道軍攻邕州不克衆潰貶死崖州以桂管觀察使鄭愚代節度南詔攻交州進略安南襲請救發湖荆桂兵五千

屯邕州嶺南韋宙奏南詔必襲邕管不先防近而圖遠
恐擣虛絕糧道且深入乃詔襲按軍海門詔鄭愚分兵
禦之襲請濟師以山南東道兵千人赴之南詔酋將楊
思僭麻光高以兵六千薄城而屯四年正月攻益急襲
錄異年尋盟言繫矢上射入其營不答俄而城陷襲闔
宗死者七十人幕府樊綽取襲印走度江荆南兵入東
鄂苦戰斬南詔二千級是夜蠻遂屠城有詔諸軍保嶺
南更以秦州經略使高駢為安南都護帝見輸發頻罷

遊韋不奏樂宰相杜棕以為非是止之南詔稍逼邕州
鄭愚自陳非將帥才願更擇人會康承訓自義成來朝
乃授嶺南西道節度使發荆襄洪鄂兵萬人從之承訓
辭兵寡乃大興諸道兵五萬往六月置行交州於海門
進為都護府調山東兵萬人益戍以容管經略使張茵
鎮之因命經略安南茵逗遛不敢進安南之陷將吏遺
人多客伏溪洞詔所在招還抹卹之免安南賦入二年
韋宙請分兵屯容藤披蠻勢五年南詔回掠雋州以搖

西南西川節度使蕭鄴率屬蠻鬼主邀南詔大度河敗之明年復來攻會刺史喻士珍貪猾陰掠兩林東蠻口縛賣之以易蠻金故開門降南詔盡殺戍卒而士珍遂臣于蠻安南久屯兩河銳士死瘴毒者十七宰相楊收議罷北軍以江西為鎮南軍募彊弩二萬建節度且地便近易調發詔可夏侯孜亦以張茵懦不足事悉以兵授高駢駢以選士五千度江敗林邑兵於邕州擊南詔龍州屯蠻酋燒貨畜走酋龍遣楊緝思助酋遷共守安

南以范肥些為安南都統趙諾眉為扶邪都統七年六月駢次交州戰數勝士酣鬪斬其將張詮李嗟龍舉衆萬人降拔波風三壁緝思出戰敗還走城士乘之超堞入斬酋遷肥些諾眉上首三萬級安南平初酋龍遣清平官董成等十九人詣成都節度使李福將廷見之成辭曰皇帝奉天命改正朔請以敵國禮見福不許道譯五返日旰士倦議不決福怒命武士捽辱之械繫于館俄而劉潼代福節度即挺其繫表縱還有詔召成等至

京師見別殿賜物良厚慰遣還國明年酋龍使楊酋慶等來謝釋囚初李師望建言成都經總蠻事曠日不能決請析邛蜀嘉眉黎雅舊七州為定邊軍建節度制機事近且速天子謂然即詔師望為節度使治邛州邛距成都才五舍舊州最南去邛乃千里緩急首尾不相副而師望利專制諱不言裒積無厭私賄以百萬計又欲激蠻怒幸有功乃殺酋慶等既而戍士怒將醢師望以逞會召還以竇滂代之滂沓冒尤不法誅責苛纖甚師

望時蠻役未興而定邊已困酋龍怨殺其使十年乃入
寇以軍綴青溪關密引衆伐木開道徑雪岷盛夏卒凍
死者二千人出沐源關嘉州破屬蠻遂次沐源滂遣充
海兵五百往戰一軍覆酋龍乃身自將督衆五萬侵騫
州攻青溪關屯將杜再榮絕大度河走諸屯皆退保北
涯蠻攻黎州詭服漢衣濟江襲犍為破之裴回陵榮間
焚廬舍掠糧畜薄嘉州刺史楊志與南詔夾江而軍士
攢射蠻不得進陰自上游濟背擊王師殺忠武將顏慶

師杰走嘉州陷明年正月攻杜再榮滂自勒兵戰酋龍
遣使者十輩請和滂信之語未半蠻桴爭岸譟而進滂
不知所為將自殺武寧將苗全緒止之殊死戰蠻稍卻
滂乃遁全緒殿而行黎州陷人走匿山谷蠻掠金帛不
勝負入自邛崃關圍雅州遂擊邛州是冬滂棄州壁導
江儲貲峙械皆亡矣酋龍進攻成都次眉州坦綽杜元
忠日夜教酋龍取全蜀於是西川節度使盧耽遣其副
王偃中人張思廣約和蠻彊之使南面拜然卒不見酋

龍而還蠻次新津耽復遣副譚奉祀好言申約蠻留之
耽畏援軍未集即飛請天子降大使通好以紓其深入
懿宗馳遣太僕卿支詳為和蠻使蠻本無謀不能乘機
會鼓行亟驅但虻結蠅營狙鹵剽小利處處留屯故蜀
孺老得扶攜悉入成都閭里皆滿戶所占地不得過一
牀雨則冒箕盎自庇城中井為竭則共飲摩訶池至爭
捽溺死者或笞沙取滴飲之死不能具棺即共坎瘞故
瀘州刺史楊慶復為耽治攻具蘭石置牢城兵八將主

之樹篲格夜列炬照城守具雄新又選悍士三千號突

將為長刀巨槌斧分左右番休日隸于軍士心侈欲鬪
而酋龍自雙流徐行內欲報董成之辱因紹耽請上介
至軍議事耽遣節度副使柳槃往見杜元忠議和元忠
妄言帝見耽請具車蓋葆嬰槃未能決還蠻以三百騎
負幄幕來大言曰供帳隋蜀王聽事為驃信行在耽不
許乃馳去蠻稍前傳外郛於是游奕使王晝督援兵三
千屯毗橋竇滂亦以其軍自導江來將與大軍犄角然

戰不甚力小不勝即保廣漢自以失定邊覲成都陷得
薄其罪會有詔斥徙軍遂無功耽部將李自孝者與刺
史喻士珍善士珍臣蠻自孝陰與賊通乃說耽城下蔣
葦稻瀦水頽城舉府不之覺蠻攻城自孝守陴樹麾以
自表麾所指蠻輒攻之為下所覺耽殺自孝以徇城左
有民樓肆蠻俯射城中耽募勇士燒之器械俱盡二月
蠻以雲梁鵝車四面攻士叫譁鵝車未至陴者以巨索
鉤繫投膏炬車焚箱間蠻卒盡死耽遣李璫張察率突

將戰城下俘斬二千級蠻徹民郭落為蓬籠如車牽下
設枕木推而前不及城大匿蠻其內以穴墉揚忤以嬰
貯糞瀋拔蠻蠻不能處注以鐵液蓬籠皆火然南詔負
衆益治器械斧斤晝夜有聲將繫錦樓衆失色耽遣將
出三面苦戰蠻引卻蠻利夜晦輒薄城聞呼嘯衆齊奮
城上施鐵籠千炬賊來不得隱屯夫終夜哄蠻不能侵
支詳遣謀與約好且謂耽毋多殺以速蠻和是時傳言
救師至城中合譟開門士爭出迎軍南詔搏戰不解日

入判官程克裕以北門兵二千乘之蠻乃走耽猶遺之
書謝不得已交兵且請和士脫鎧迎支詳詳陳所齎植
二旗署曰賜雲南幣物謂蠻使者曰天子詔雲南和解
而兵薄成都奈何請退舍撤警以修好或勸詳蠻多詐
毋入死地詳不行蠻復圍成都夜穿西北隅黎旦乃覺
即頽焚火于孺蠻皆死穴中以鐵絙曳雲輜仆之燎作
少選盡益固守是時帝遣東川節度使顏慶復為大度
河制置劔南應接使兵次新都博野將曾元裕敗蠻兵

斬二千級南詔騎數萬晨壓官軍以驍大將宋威以忠
武兵戰斬首五千獲馬四百尾南詔退屯星宿山威進
戍沱江酋龍遣酋望至支詳所請和詳曰今列城固守
北軍望功歸語而主審自度耽遣銳將趣蠻壁燒攻具
殺二千人為南詔所躡卻而潰蠻聞鳳翔山南軍且來
乃迎戰毗橋不勝趨沱江為伏士所擊又敗城中出突
將夜火蠻營酋龍坦綽身督戰後三日王師奪昇遷梁
蠻大敗夜燒亭傳乘火所向雨矢射王師威疏軍行嚮

矢所發叢射之兩軍不能決各解去酋龍知不敵夜徹
營南奔至雙沅江無梁計窮將赴水死或止之曰今北
軍與成都兵合若來追我無類矣不如偽和以紓急不
然死未晚乃來請三日梁成而濟即斷梁按隊緩驅黎
州刺史嚴師本收散卒保邛州酋龍懼圍二日去蠻俘
華民必劓耳鼻已縱之既而居人刻木為耳鼻者什八
慶復之來衆以其弟慶師死于蠻必甘心及成都不破
以已功輕乃按軍廣溪縱殘寇人人切齒初成都無隍

塹乃教耽濬隍廣三丈作戰棚于埤列左右屯營營別
五區區卒五十蔣阜莢夾塙後三年合拱又為大旛連
弩自是南詔憚之首龍年少嗜殺戮親戚異己者皆斬
兵出無寧歲諸國更讎忿屢覆衆國耗虛蜀之役男子
十五以下悉發婦耕以餉軍十四年坦綽復寇蜀桓舟
大度河以濟為刺史黃景復擊却之衆循河而南夜桴
上流兵夾攻頻水諸屯景復敗走還黎州蠻躡追為景
復所敗會蠻踵來還攻大度河仆旗息鼓請曰坦綽欲

上書天子白冤事成兵信之不戰橋成而濟黎州陷遂
攻雅州擊定邊軍卒潰入邛州成都大震人亡入玉壘
關士乘城坦綽遣使者王保成等四十人齎驃信書遺
節度使牛叢欲假道入朝請憇蜀王故殿叢欲許之楊
慶諫曰蠻無信彼禮屈辭甘詐我也請斬其使留二人
還書叢因責之曰詔王之祖六詔最小夷也天子錄其
勤合六詔為一俾附庸成都名之以國許子弟入太學
使習華風今乃自絕王命且崔蛇犬馬猶能報德王乃

不知蟲鳥乎比成都以武備未修故令爾突我疆場然
毗橋沱江之敗積弊附城不四年復來今吾有十萬衆
捨其半未用以千人為軍十軍為部驍將主之凡部有
彊弩二百鎗斧輔之勁弓二百越銀刀輔之長戈二百
掇刀輔之短矛二百連鎚輔之又軍四面面有鐵騎五
百悉收芻薪米粟牛馬犬豕清野待爾吾又能以旁騎
畧爾樵采我日出以一部與爾戰部別二番日中而代
日昃一部至以夜屯月明則戰黑則休夜半而代凡我

兵五日一殺敵爾乃晝夜戰不十日惜且死矣州縣繕
甲厲兵犄角相從皆蠶之深讎雖女子能齧斷薄賊况
彊夫烈士哉爾祖嘗奴事西蕃為爾仇家今顧臣之何
恩讎之戾邪蜀王故殿先世之寶宮非邊夷所宜舍神
怒人情驟信且死叢猶火郊民室廬觀閣嚴兵為固守
計坦綽至新津而還回寇黔中經略使秦匡謀懼奔荆
南會僖宗立遣金吾將軍韓重持節往使俄攻黎州景
復擊走之乾符元年劫略雋雅間破黎州入邛崃關掠

成都成都閉三日蠻乃去詔徙天平軍高駢領西川節
度使乃奏蠻小醜勢易制而蜀道險館饑窮更今左神
策所發長武河東兵多用度繁廣且彼皆扼制羌戎不
可以弛備詔乃罷長武等兵駢至不淹月閱精騎五千
逐蠻至大度河奪鎧馬執酋長五十斬之收邛崃關復
取黎州南詔遁還駢召景復責大度河之敗斬以徇成
望星清溪等關南詔懼遣使者詣駢結好而踵出兵寇
邊駢斬其使初安南經畧判官杜驤為蠻所俘其妻宗

室女也故酋龍使奉書丐和駢答曰我且將百萬衆至
龍尾城問爾罪酋龍大震自南詔叛天子數遣使至其
境酋龍不肯拜使者遂絕駢以其俗尚浮屠法故遣浮
屠景仙攝使往酋龍與其下迎謁且拜乃定盟而還遣
清平官酋望趙宗政質子三十入朝乞盟請為兄弟若
舅甥詔拜景仙鴻臚卿檢校左散騎常侍駢結吐蕃尚
延心盟未魯耨月等為間築戎州馬湖沐源川大度河
三城列屯拒險料壯卒為平夷軍南詔氣奪酋龍恚發

疽死偽謚景莊皇帝子法嗣改元貞明承智大同自號
大封人法年少好畋獵酣逸衣絳紫錦罽鍤金帶國事
頗決大臣乾符四年遣陀西段珙寶詣邕州節度使辛
儼請修好詔使者答報未幾寇西川駢奏請與和親右
諫議大夫柳韜吏部侍郎崔澹醜其事上言遠蠻畔逆
乃因浮屠誘致又議和親垂笑後世駢職上將謀乖謬
不可從遂寢蠻使者再入朝議和親而駢徙荆南持前
請不置宰相鄭畋盧攜爭不決皆賜罷辛儼遣幕府徐

雲虔攝使者往覘到善闡府見騎數十曳長矛擁絳服

少年朱繒約髮典客如佗酋孫慶曰此驃信也問天子

起居下馬揖客取使者佩刀視之自解左右鈕以示乃

除地剗三丈版命左右馳射每一人射法駭馬逐以為

樂數十發止引客就幄俵子捧瓶盃四女子侍樂飲夜

乃罷又遣問客春秋大義送使者還是時駢從節鎮海

効澹等沮議帝蒙弱不能曉下詔慰解西川節度使崔

安潛上言蠻蓄鳥獸心不識禮義安可以賤隸尚貴主

失國家大體澹等議可用臣請募義征子率十戶一保
願發山東銳兵六千戍諸州比五年蠻可為奴久之帝
手詔問安潛和親事答曰雲南姚州譬一縣中國何資
於彼而遣重使加厚禮彼且妄謂朝廷畏怯無能為脫
有它請陛下何以待之且天宗近屬不可下小蠻夷臣
比移書不言舅甥黜所僭也有如蠻使者不復至當遣
謀人伺其隙可以得志南詔知蜀彊故襲安南陷之都
護曾袞奔邕府戍兵潰會西川節度使陳敬瑄申和親

議時盧攜復輔政與豆盧瑑皆厚駢乃譎說帝曰陛下
初即位遣韓重使南詔將官屬留蜀期年費不貲蠻不
肯迎及駢節度西川招盟末繕甲訓兵蠻夷震動遣趙
宗政入獻見天子附驃信再拜雲虔之使驃信答拜其
於禮不為少宣宗皇帝收三州七關平江嶺以南至大
中十四年內庫貨積如山戶部延資充滿故宰相敏中
領西川庫錢至三百萬緡諸道亦然咸通以來蠻始叛
命再入安南邕管一破黔州四盜西川遂圍盧耽召兵

東方戍海門天下騷動十有五年賦輸不內京師者過
半中藏空虛士死瘡癘燎骨傳灰人不念家亡命為盜
可為痛心前年留宗政等南方無虞及遣還彼猶冀望
蒙法立三年比兵不出要防其蓄力以間我虞今朝廷
府庫匱甲兵少牛叢有北兵七萬首尾奔衝不能救况
安南客戍單寡涉冬寇禍可虞誠命使者臨報縱未稱
臣且伐其謀外以縻服蠻夷內得蜀休息也帝謂然乃
以宗室女為安化長公主許婚拜嗣曹王龜年宗正少

卿為雲南使大理司直徐雲虔副之內常侍劉光裕為雲南內使霍承錫副之及還具言驃信誠款以為敬瑄功故進檢校司空賜一子官法遣宰相趙隆眉楊奇混段義宗朝行在迎公主高駢自揚州上言三人者南詔心腹也宜止而鴆之蠻可圖也帝從之隆眉等皆死自是謀臣盡矣蠻益衰中和元年復遣使者來迎主獻珍怪氈罽百牀帝以方議公主車服為解後二年又遣布燮楊奇肱來迎詔檢校國子祭酒張譙為禮會五禮使

徐雲虔副之宗正少卿嗣虢王約為婚使未行而黃巢
平帝東還乃歸其使法死偽謚聖明文武皇帝子舜化
立建元中興遣使款黎州修好昭宗不答後中國亂不
復通先是有時傍矣川羅識二族通號八詔時傍母歸
義女也其女復妻閭羅鳳初咩羅皮之敗時傍入居迤
川州誘上浪千餘勢稍張為閭羅所猜徙置白崖城後
與矣川羅識詣神川都督求自立為詔謀洩被殺矣川
羅識奔神川都督送之羅些城

蒙騫詔最大其王騫輔首死無子弟佉陽照立佉陽照
死子照原立喪明子原羅質南詔歸義欲并國故歸其
子原羅衆果立之居數月使人殺照原逐原羅遂有其
地

越析詔或謂磨些詔居故越析州西距曩葱山一日行
貞元中有豪酋張尋求弒其王波衝妻因殺波衝劔南
節度使召尋求至姚州殺之部落無長以地歸南詔波
衝兄子于贈持王所寶鐸鞘東北度瀘邑于龍佉河纔

百里號雙舍使部酋楊墮居河東北歸義樹壁侵于贈
不克閤羅鳳自請往擊楊墮破之于贈投瀘死得鐸鞘
故王出軍必雙執之

浪穹詔其王豐時死于羅鐸立羅鐸死于鐸羅望立為
浪穹州刺史與南詔戰不勝挈其部保劍川更稱劍浪
死子望偏立望偏死子偏羅矣立偏羅矣死子羅君立
貞元中南詔擊破劍川虜羅君徙永昌凡浪穹遼賧施
浪總謂之浪人亦稱三浪

遼朕詔其王豐咩初據遼朕為御史李知古所殺子咩
羅皮自為遼川州刺史治大蘆城歸義襲敗之復入遼
朕與浪穹施浪合拒歸義既戰大敗歸義奪遼朕咩羅
皮走保野其川死子皮羅鄧立皮羅鄧死子鄧羅顛立
鄧羅顛死于顛文託立南詔破劍川虜之徙永昌

施浪詔其王施望欠居矣苴和城有施各皮者亦八詔
之裔據石和城閤羅鳳攻虜之而施望欠孤立故與咩
羅皮合攻歸義不勝歸義以兵脅降其部施望欠以族

走永昌獻其女遺南詔丐和歸義許之度蘭江死弟望
千走吐蕃吐蕃立為詔納之劍川衆數萬望千死子千
旁羅顛立南詔破劍川千旁羅顛走瀘北三浪悉滅唯
千旁羅顛及矣川羅識子孫在吐蕃

贊曰唐之治不能過兩漢而地廣於三代勞民費財禍
所繇生晉獻公殺嫡賊二公子號為閹君明皇一日殺
三庶人昏蔽甚矣嗚呼父子不相信而遠治閹羅鳳之
罪士死十萬當時寃之懿宗任相不明藩鎮屢畔南詔

內侮屯戍思亂龐勛乘之倡戈橫行雖凶渠殲夷兵連
不解唐遂以亡易曰喪牛于易有國者知戒西北之虞
而不知患生於無備漢亡於董卓而兵兆於冀州唐亡
於黃巢而禍基於桂林易之意深矣

唐書卷二百二十二中

唐書卷二百二十二中考證

南蠻傳中子尋閣勸立○舊書作筭蒙閣

子勸龍晟立○舊書作龍蒙盛

唐書卷二百二十中考證

欽定四庫全書薈要卷五千三百六十八

史部

唐書卷二百二十二下

宋端明殿學士宋祁撰

列傳第一百四十七下

南蠻

環王本林邑也一曰占不勞亦曰占婆直交州南海行
三千里地東西三百里而羸南北千里西距真臘霧溫
山南抵奔浪陀州其南大浦有五銅柱山形若倚蓋西

重巖東涯海漢馬援所植也又有西屠夷蓋援還留不去者才十戶隋末孳衍至三百皆姓馬俗以其寓故號馬留人與林邑分唐南境其地冬溫多霧雨產虎魄猩猩獸結遼鳥以二月為歲首稻歲再熟取檳榔瀋為酒椰葉為席俗凶悍果戰鬪以麝塗身日再塗再澡拜謁則合掌頓顙有文字喜浮屠道治金銀像大或十圍呼王為陽蒲逋王妻為陀陽阿熊太子為阿長逋宰相為婆漫地王所居曰占城別居曰齊國曰蓬皮勢王衣白

氎古貝斜絡臂飾金珮為纓髻髮戴金華冠如章甫妻
服朝霞古貝短裙冠纓如王王衛兵五千戰乘象藤為
鎧竹為弓矢率象千馬四百分前後不設刑有罪者使
象踐之或送不勞山畀自死隋仁壽中遣將軍劉芳伐
之其王范梵志挺走以其地為三郡置守令道阻不得
通梵志哀遺衆別建國邑武德中再遣使獻方物高祖
為設九部樂饗之貞觀時王頭黎獻馴象鏐鎖五色帶
朝霞布火珠與婆利羅刹二國使者偕來林邑其言不

恭羣臣請問罪太宗曰昔苻堅欲吞晉衆百萬一戰而亡隋取高麗歲調發人與為怨乃死匹夫手朕敢妄議發兵邪赦不問又獻五色鸚鵡白鸚鵡數訴寒有詔還之頭黎死子鎮龍立獻通天犀雜寶十九年摩訶慢多加獨弑鎮龍滅其宗范姓絕國人立頭黎壻婆羅門為王大臣共廢之更立頭黎女為王諸葛地者頭黎之姑子父得罪奔真臘女之王不能定國大臣共迎諸葛地為王妻以女永徽至天寶凡三入獻至德後更號環王

元和初不朝獻安南都護張舟執其偽驩愛州都統斬
三萬級虜王子五十九獲戰象舳鎧婆利者直環王東
南自交州汎海歷赤土丹丹諸國乃至地大洲多馬亦
號馬禮衰長數千里多火珠大者如雞卵圓白照數尺
日中以艾藉珠輒火出產瑇瑁文螺石柑初取柔可治
既鏤刻即堅有舍利鳥通人言俗黑身朱髮而拳鷹爪
獸牙穿耳傳璫以古貝橫一幅繚于胷古貝草也緝其
花為布粗曰貝精曰氎俗以夜為市自掩其面王姓刹

利邪伽名護路邪婆世居位繚班絲貝綴珠為飾坐金
榻左右持白拂孔雀翼出以象駕車羽蓋珠箔鳴金擊
鼓歛蠶為樂其東即羅刹也與婆利同俗隋煬帝遣常
駿使赤土遂通中國赤土西南入海得婆羅總章二年
其王旃達鉢遣使者與環王使者偕朝環王南有殊禁
者汎交趾海三月乃至與婆羅同俗貞觀二年使者上
方物九年甘棠使者入朝國居海南十二年僧高武令
迦乍鳩密四國使者朝貢僧高直水真臘西北與環王

同俗其後鳩密王尸利鳩摩又與富那王尸利提婆跋摩等遣使來貢僧高等國永徽後為真臘所并

盤盤在南海曲北距環王限少海與狼牙脩接自交州海行四十日乃至王曰楊栗翼其民瀕水居比木為柵石為矢鏃王坐金龍大榻諸大人見王交手抱肩以跽其臣曰敎郎索濫曰崑崙帝也曰崑崙勃和曰崑崙敎諦索甘亦曰古龍古龍者崑崙聲近耳在外曰那延猶中國刺史也有佛道士祠僧食肉不飲酒道士謂為貪

不食酒肉貞觀中再遣使朝其東南有哥羅一曰箇羅
亦曰哥羅富沙羅王姓矢利波羅名米失鉢羅累石為
城樓闕宮室茨以草州二十四其兵有弓矢稍及以孔
雀羽飾纛每戰以百象為一隊一象百人鞍若檻四人
執弓稍在中賦率輸銀二銖無絲紵惟古貝畜多年少
馬非有官不束髮凡嫁娶納檳榔為禮多至二百盤婦
已嫁從夫姓樂有琵琶橫笛銅鈸鐵鼓蠡死者焚之取
燼貯金罌沉之海東南有拘婁密海行一月至南距婆

利行十日至東距不述行五日至西北距文單行六日
至與赤土墮和羅同俗永徽中獻五色鸚鵡

扶南在日南之南七千里地卑窪與環王同俗有城郭
宮室王姓古龍居重觀柵城楮葉以覆屋王出乘象其
人黑身鬚髮裸行俗不為寇盜田一歲種三歲穫國出
剛金狀類紫石英生水底石上人沒水取之可以刻玉
扣以殺角乃泮人喜鬪雞及猪以金珠香為稅治特牧
城俄為真臘所并益南徙那弗那城武德貞觀時再入

朝又獻白頭人二白頭者直扶南西人皆素首膚理如脂居山穴四面峭絕人莫得至與參半國接

真臘一曰吉蔑本扶南屬國去京師二萬七百里東距車渠西屬驃南瀕海北與道明接東北抵驩州其王刹利伊金那貞觀初并扶南有其地戶皆東嚮坐上東客至屑檳榔龍腦香蛤以進不飲酒比之淫與妻飲房中避尊屬有戰象五千良者飼以肉世與參半驃通好與環王乾陀洹數相攻自武德至聖歷凡四來朝神龍後

分為二半北多山阜號陸真臘半南際海饒陂澤號水
真臘半水真臘地八百里王居婆羅提拔城陸真臘或
曰文單曰婆鏤地七百里王號苴屈開元天寶時王子
率其屬二十六來朝拜果毅都尉大厯中副王婆彌及
妻來朝獻馴象十一擢婆彌試殿中監賜名賓漢是時
德宗初即位珍禽奇獸悉縱之蠻夷所獻馴象畜苑中
元會充廷者凡三十二悉放荆山之陽及元和中水真
臘亦遣使入貢文單西北屬國曰參半武德八年使者

來道明者亦屬國無衣服見衣服者共笑之無鹽鐵以竹弩射鳥獸自給

訶陵亦曰社婆曰閭婆在南海中東距婆利西墮婆登南瀕海北真臘木為城雖大屋亦覆以楫櫓象牙為牀若席出瑇瑁黃白金犀象國最富有穴自湧鹽以柳花椰子為酒飲之輒醉宿昔壤有文字知星厯食無七筋有毒女與接輒苦瘡人死尸不腐王居閭婆城其祖吉延東遷於婆露伽斯城旁小國二十八莫不臣服其官

有三十二大夫而大坐敢兄為最貴山上有郎卑野州
王常登以望海夏至立八尺表景在表南二尺四寸貞
觀中與墮和羅墮婆登皆遣使者入貢太宗以璽詔優
答墮和羅巧良馬帝與之至上元間國人推女子為王
號悉莫威令整肅道不舉遺大食君聞之齎金一囊置
其郊行者輒避如是三年太子過以足躡金悉莫怒將
斬之羣臣固請悉莫曰而罪實本於足可斷趾羣臣復
為請乃斬指以徇大食聞而畏之不敢加兵大厯中訶

陵使者三至元和八年獻僧祇奴四五色鸚鵡頻伽鳥
等憲宗拜內四門府左果毅使者讓其弟帝嘉美竝官
之訖大和再朝貢咸通中遣使獻女樂墮和羅亦曰獨
和羅南距盤盤北迦邏舍弗西屬海東真臘自廣州行
五月乃至國多美犀世謂墮和羅犀有二屬國曰曇陵
陀洹曇陵在海洲中陀洹一曰耨陀洹在環王西南海
中與墮和羅接自交州行九十日乃至王姓察失利名
婆那字婆末無蠶桑有稻麥麻豆畜有白象牛羊豬俗

喜樓居謂為干欄以白氎朝霞布為衣親喪在室不食
燔屍已則剔髮浴于池然後食貞觀時竝遣使者再入
朝又獻婆律膏白鸚鵡首有十紅毛齊于翅因丐馬銅
鍾帝與之墮婆登在環王南行二月乃至東訶陵西迷
黎車北屬海俗與訶陵同種稻月一熟有文字以貝多
葉寫之死者實金于口以釧貫其體加婆律膏龍腦衆
香積薪燔之

投和在真臘南自廣州西南海行百日乃至王姓投和

羅名脯邪迂送官有朝請將軍功曹主簿贊理贊府分
領國事分州郡縣三等州有參軍郡有金威將軍縣有
城有局長官得選僚屬自助民居率樓閣畫壁王宿衛
百人衣朝霞耳金環金縵被頸寶飾革履頻盜者死次
穿耳及頰而斂其髮盜鑄者截手無賦稅民以地多少
自輸王以農商自業銀作錢類榆莢民乘象及馬無鞍
勒繩穿頰御之親喪斷髮為孝焚尸斂灰于甕沈之水
貞觀中遣使以黃金函內表并獻方物

瞻博或曰瞻婆北距兢伽河多野象羣行顯慶中與婆
岸千支弗舍跋若磨臘四國並遣使者入朝千支在西
南海中本南天竺屬國亦曰半支跋若唐言五山也北
距多摩菴又有哥羅舍分脩羅分甘畢三國貢方物甘
畢在南海上東距環王王名旃陀越摩有勝兵五千哥
羅舍分者在南海南東墮和羅脩羅分者在海北東距
真臘其風俗大畧相類有君長皆柵郭二國勝兵二萬
甘畢才五千又有多摩菴東距婆鳳西多隆南千支弗

北訶陵地東西一月行南北二十五日行其王名骨利
說云得大卵剖之獲女子美色以為妻俗無姓婚姻不
別同姓王坐常東向勝兵二萬有弓刀甲稍無馬果有
波那婆宅護遮菴摩石榴其國經薩盧都訶盧君那盧
林邑諸國乃得交州顯慶中貢方物

室利佛逝一曰尸利佛誓過軍徒弄山二千里地東西
千里南北四千里而遠有城十四以二國分總西曰郎
婆露斯多金汞砂龍腦夏至立八尺表影在表南二尺

五寸國多男子有橐它豹文而犀角以乘且耕名曰它
牛豹又有獸類野豕角如山羊名曰雩肉味美以饋膳
其王號曷蜜多咸亨至開元間數遣使者朝表為邊吏
侵掠有詔廣州慰撫又獻侏儒僧祇女各二及歌舞官
使者為折衝以其王為左威衛大將軍賜紫袍金鈿帶
後遣子入獻詔宴于曲江宰相會冊封賓義王授右金
吾衛大將軍還之

名茂東接真陀桓西但游南屬海北波刺其地一月行

有州三十以十二月為歲首王衣朝霞氎賦二十取一
交易皆用金準直其人短小兄弟共娶一妻婦總髮為
角辨夫之多少王號斯多題龍朔初使者來貢

單單在振州東南多羅磨之西亦有州縣木多白檀王
姓利利名尸陵如日視事有八大臣號八坐王以香塗
身冠雜寶璽近行乘車遠乘象戰必吹蠡擊鼓盜無輕
重皆死乾封總章時獻方物羅越者北距海五千里西
南哥谷羅商賈往來所湊集俗與墮羅鉢底同歲乘舶

至廣州州必以聞

驃古朱波也自號突羅朱闍婆國人曰徒里拙在永昌
南二千里去京師萬四千里東陸真臘西接東天竺西
南墮和羅南屬海北南詔地長三千里廣五千里東北
袤長屬羊苴咩城凡屬國十八曰迦羅婆提曰摩禮烏
特曰迦黎迦曰半地曰彌臣曰坤朗曰偈奴曰羅聿曰
佛代曰渠論曰婆黎曰偈陀曰多歸曰摩曳餘即舍衛
瞻婆闍婆也凡鎮城九曰道林王曰悉利移曰三陀曰

彌諾道立曰突旻曰帝偈曰達梨謀曰乾唐曰末浦凡
部落二百九十八以名見者三十二曰萬公曰充菴曰
羅君潛曰彌綽曰道雙曰道甕曰道勿曰夜半曰不惡
奪曰莫音曰伽龍朕曰阿梨吉曰阿梨閣曰阿梨忙曰
達磨曰求潘曰僧塔曰提梨郎曰望騰曰擔泊曰祿烏
曰乏毛曰僧迦曰提追曰阿末邏曰逝越曰騰陵曰歐
咩曰磚羅婆提曰祿羽曰陋蠻曰摩地勃繇彌臣至坤
朗又有小崑崙部王名茫悉越俗與彌臣同繇坤朗至

祿羽有大崑崙王國王名思利泊婆難多珊那川原大
於彌臣繇崑崙小王所居半日行至磨地勃柵海行五
月至佛代國有江支流三百六十其王名思利些彌他
有川名思利毗離芮土多異香北有市諸國估舶所湊
越海即闍婆也十五日行踰二大山一曰正迷一曰射
鞞有國其王名思利摩訶羅闍俗與佛代同經多茸補
邏川至闍婆八日行至婆賄伽盧國土熱衢路植椰子
檳榔仰不見日王居以金為甕廚覆銀瓦爨香木堂飾

明珠有二池以金為隄舟楫皆飾金寶驃王姓困沒長
名摩羅惹其相名曰摩訶思那王出與以金繩牀遠則
乘象嬪史數百人青甕為圓城周百六十里有十二門
四隅作浮圖民皆居中鉛錫為瓦荔支為材俗惡殺拜
以手抱臂稽顙為恭明天文喜佛法有百寺琉璃為甃
錯以金銀丹彩紫鑛塗地覆以錦罽王居亦如之民七
歲祝髮止寺至二十有不達其法復為民衣用白氎朝
霞以蠶帛傷生不敢衣戴金花冠翠冒絡以雜珠王宮

設金銀二鐘冠至焚香擊之以占吉凶有巨白象高百尺訟者焚香跪象前自思是非而退有災疫王亦焚香對象跪自咎無桎梏有罪者束五竹捶背重者五輕者三殺人則死土宜菽粟稻粱蔗大若脰無麻麥以金銀為錢形如半月號登伽佗亦曰足彈陀無膏油以蠟雜香代炷與諸蠻市以江豬白氎琉璃罌缶相易婦人當頂作高髻飾銀珠琲衣青婆裙披羅段行持扇貴家者傍至五六近城有沙山不毛地亦與波斯婆羅門接距

西舍利城二十日行西舍利者中天竺也南詔以兵彊
地接常羈制之貞元中王雍羌聞南詔歸唐有內附心
異牟尋遣使揚加明詣劍南西川節度使韋臯請獻夷
中歌曲且令驃國進樂人於是臯作南詔奉聖樂用正
律黃鍾之均宮徵一變象西南順也角羽終變象戎夷
革心也舞六成工六十四人贊引二人序曲二十八疊
舞南詔奉聖樂字舞人十六執羽翟以四為列舞南字
歌聖主無為化舞詔字歌南詔朝天樂舞奉字歌海字

脩文化舞聖字歌雨露覃無外舞樂字歌闢土丁零塞
皆一章三疊而成舞者初定執羽簫鼓等奏散序一疊
次奏第二疊四行贊引以序入將終雷鼓作於四隅舞
者皆拜金聲作而起執羽稽首以象朝覲每拜跪節以
鉦鼓次奏拍序一疊舞者分左右蹈舞每四拍揖羽稽
首拍終舞者拜復奏一疊蹈舞抃揖以合南字字成徧
終舞者北面跪歌導以絲竹歌已俯伏鉦作復揖舞餘
字皆如之唯聖字詞末皆恭揖以明奉聖每一字曲三

疊名為五成次急奏一疊四十八人分行磬折象將臣
禦邊也字舞畢舞者十六人為四列又舞闕四門之舞
遽舞入徧兩疊與鼓吹合節進舞三退舞三以象三才
三統舞終皆稽首逡巡又一人舞億萬壽之舞歌天南
溟越俗四章歌舞七疊六成而終七者火之成數象天
子南面生成之恩六者坤數象西南向化凡樂三十工
百九十六人分四部一龜茲部二大鼓部三胡部四軍
樂部龜茲部有羯鼓拊鼓鼙鼓雞婁鼓短笛大小箏篋

拍板皆八長短簫橫笛方響大銅鈸貝皆四凡工八十
八人分四列屬舞筵四隅以合節鼓大鼓部以四為列
凡二十四居龜茲部前胡部有箏大小笙篪五絃琵琶
笙橫笛短笛拍板皆八大小觿篳篥皆四工七十二人分
四列屬舞筵之隅以導歌詠軍樂部金鐃金鐸皆二摑
鼓金鈺皆四鈺鼓金飾蓋垂流蘇工十二人服南詔服
立闕四門舞筵四隅節拜合樂又十六人畫半臂執摑
鼓四人為列舞人服南詔衣絳裙襦黑頭囊金佉苴畫

皮鞞首飾祿額冠金寶花鬘襦上復加畫半臂執羽翼
舞俯伏以象朝拜裙襦畫鳥獸草木文以八綵雜華以
象庶物咸遂羽葆四垂以象天無不覆正方布位以象
地無不載分四列以象四氣舞為五字以象五行秉羽
翟以象文德節鼓以象號令遠布振以鐸明采詩之義
用龜茲等樂以象遠夷悅服鉦鼓則古者振旅獻捷之
樂也黃鍾君聲配運為土明土德常盛黃鍾得乾初九
自為其宮則林鍾四律以正聲應之象大君南面提天

統於上乾道明也林鍾得坤初六其位西南西南感至
化於下坤體順也太簇得乾九二是為人統天地正而
三才通故次應以太簇三才既通南呂復以羽聲應之
南呂酉西方金也羽北方水也金水悅而應平時以象
西戎北狄悅服然後姑洗以角音終之姑故也洗濯也
以象南詔背吐蕃歸化洗過日新臯以五宮異用獨唱
殊音復述五均譜分金石之節奏一曰黃鍾宮之宮軍
士歌奉聖樂者用之舞人服南詔衣秉翟俯伏拜拊合

南詔奉聖樂五字唱詞五舞人乃易南方朝天之服絳色七節襦袖節有青標排衿以象鳥翼樂用龜茲胡部金鈺搗鼓鐃貝大鼓二曰太簇商之宮女子歌奉聖樂者用之合以管絃若奏庭下則獨舞一曲樂用龜茲鼓笛各四部與胡部等合作琵琶笙箏篳篥皆八大小觱篥箏五絃琵琶長笛短笛方響各四居龜茲部前次貝一人大鼓十二分左右餘皆坐奏三曰姑洗角之宮應古律林鍾為徵宮女子歌奉聖樂者用之舞者六十四人

飾羅綵襦袖間以八采曳雲花履首飾雙鳳八卦綵雲
花鬋執羽為拜拊之節以林鍾當地統象歲功備萬物
成也雙鳳明律呂之和也八卦明還相為用也綵雲象
氣也花鬋象冠也合奉聖樂三字唱詞三表天下懷聖
也小女子字舞則碧色襦袖象角音主木首飾巽卦應
姑洗之氣以六人略後象六合一心也樂用龜茲胡部
其鉦柎鐃鐸皆覆以綵蓋飾以花趺上陳錦綺垂流蘇
按瑞圖曰王者有道則儀鳳在鼓故羽葆鼓柝以鳳凰

鉦棲孔雀鐃鐸集以翔鶯鉦捫頂足又飾南方鳥獸明
澤及飛走翔伏鉦捫鐃鐸皆二人執擊之貝及大鼓工
伎之數與軍士奉聖樂同而加鼓笛四部四曰林鍾徵
之宮斂拍單聲奏奉聖樂丈夫一人獨舞樂用龜茲鼓
笛每色四人方響二置龜茲部前二隅有金鉦中植金
鐸二貝二鈴鉞二大鼓十二分左右五曰南呂羽之宮
應古律黃鍾為君之宮樂用古黃鍾方響一大琵琶五
絃琵琶大箏篳篥倍黃鍾觱篥小觱篥竽笙塤箎搗箏軋

箏黃鍾簫笛倍笛節鼓拍板等工皆一人坐奏之絲竹
緩作一人獨唱歌工復通唱軍士奉聖樂詞雍羌亦遣
弟悉利移城主舒難陀獻其國樂至成都韋臯復譜次
其聲以其舞容樂器異常乃圖畫以獻工器二十有二
其音八金貝絲竹匏革牙角金二貝一絲七竹二匏二
革二牙一角二鈴鉞四制如龜茲部周圓三寸貫以韋
擊磬應節鐵板二長三寸五分博二寸五分面平背有
柄係以韋與鈴鉞皆飾條紛以花氎縷為葉螺貝四大

者可受一升飾條紛有鳳首瑩篴二其一長二尺腹廣
七寸鳳首及項長二尺五寸面飾虺皮絃一十有四項
有軫鳳首外向其一項有條軫有鼉首箏二其一形如
鼉長四尺有四足虛腹以鼉皮飾背面及仰肩如琴廣
七寸腹闊八寸尾長尺餘卷上虛中施關以張九絃左
右一十八柱其一面飾彩花傅以虺皮為別有龍首琵琶
一如龜茲製而項長二尺六寸餘腹廣六寸二龍相
向為首有軫柱各三絃隨其數兩軫在項一在頸其覆

形如師子有雲頭琵琶一形如前面飾虺皮四面有牙釘以雲為首軫上有花象品字三絃覆手皆飾虺皮刻捍撥為舞崑崙狀而彩飾之有大匏琴二覆以半匏皆彩畫之上加銅甌以竹為琴作虺文橫其上長三尺餘頭曲如拱長二寸以絛繫腹穿甌及匏本可受二升大絃應太簇次絃應姑洗有獨絃匏琴以班竹為之不加飾刻木為虺首張絃無軫以絛繫頂有四柱如龜茲琵琶絃應太簇有小匏琴二形如大匏琴長二尺大絃應

南呂次應應鍾有橫笛二一長尺餘取其合律去節無
爪以蠟實首上加師子頭以牙為之穴六以應黃鍾商
備五音七聲又一管唯加象首律度與荀勗笛譜同又
與清商部鍾聲合有兩頭笛二長二尺八寸中隔一節
節左右開衝氣穴兩端皆分洞體為笛量左端應太簇
管末三穴一姑洗二蕤賓三夷則右端應林鍾管末三
穴一南呂二應鍾三大呂下托指一穴應清太簇兩洞
體七穴共備黃鍾林鍾兩均有大匏笙二皆十六管左

右各八形如鳳翼大管長四尺八寸五分餘管參差相次製如笙管形亦類鳳翼竹為簧穿匏達本上古八音皆以木漆代之用金為簧無匏音唯驃國得古製又有小匏笙二製如大笙律應林鍾商有三面鼓二形如酒缸高二尺首廣下銳上博七寸底博四寸腹廣不過首冒以虺皮束三為一碧條約之下當地則不冒四面畫驃國工伎執笙鼓以為飾有小鼓四製如腰鼓長五寸首廣三寸五分冒以虺皮牙釘彩飾無柄搖之為樂節

引贊者皆執之有牙笙穿匏達本漆之上植二象牙代
管雙簧皆應姑洗有三角笙亦穿匏達本漆之上植三
牛角一簧應姑洗餘應南呂角銳在下穿匏達本柄觚
皆直有兩角笙亦穿匏達本上植二牛角簧應姑洗匏
以彩飾凡曲名十有二一曰佛印騾云沒馱彌國人及
天竺歌以事王也二曰讚娑羅花騾云隴莽第國人以
花為衣服能淨其身也三曰白鶴騾云答都美其飛止
遂情也四曰白鶴游騾云蘇謾底哩謂翔則摩空行則

徐步也五曰鬪羊勝驃云來乃昔有人見二羊鬪海岸
彊者則見弱者入山時人謂之來乃來乃者勝勢也六
曰龍首獨琴驃云彌思彌此一絃而五音備象王一德
以畜萬邦也七曰禪定驃云掣覽詩謂離俗寂靜也七
曲唱舞皆律應黃鍾商八曰甘蔗王驃云過思略謂佛
教民如蔗之甘皆悅其味也九曰孔雀王驃云桃臺謂
毛采光華也十曰野鷺謂飛止必雙徒侶畢會也十一
曰宴樂驃云籠聰網摩謂時康宴會嘉也十二曰滌煩

亦曰笙舞驃云扈那謂時滌煩啓以此適情也五曲律
應黃鍾兩均一黃鍾商伊越調一林鍾商小植調樂工
皆崑崙衣絳氎朝霞為蔽膝謂之祴襦兩肩加朝霞絡
腋足臂有金寶鏤釧冠金冠左右珥璫條貫花鬘珥雙
簪散以毳初奏樂有贊者一人先導樂意其舞容隨曲
用人或二或六或四或八至十皆珠冒拜首稽首以終
節其樂五譯而至德宗授舒難陀太僕卿遣還開州刺
史唐次述驃國獻樂頌以獻太和六年南詔掠其民三

千徙之柘東兩爨蠻自曲州靖州西南昆川曲軌晉寧
喻獻安寧距龍和城通謂之西爨白蠻自彌鹿升麻二
川南至步頭謂之東爨烏蠻西爨自云本安邑人七世
祖晉南寧太守中國亂遂王蠻中梁元帝時南寧州刺
史徐文盛召詣荊州有爨瓚者據其地延袤二千餘里
土多駿馬犀象明珠既死子震翫分統其衆隋開皇初
遣使朝貢命韋世冲以兵戍之置恭州協州昆州未幾
叛史萬歲擊之至西洱河滇池而還震翫懼而入朝文

帝誅之諸子沒為奴高祖即位以其子弘達為昆州刺

史奉父喪歸而益州刺史段綸遣俞大施至南寧治共

範川誘諸部皆納款貢方物太宗遣將擊西爨開青蛉

弄棟為縣爨蠻之西有徒莫祗蠻儉望蠻貞觀二十三

年內屬以其地為傍望覽丘求五州隸郎州都督府白

水蠻地與青蛉弄棟接郎州亦隸弄棟西有大勃弄小

勃弄二川蠻其西與黃瓜葉榆西洱河接其衆完富與

蜀埒無酋長喜相讎怨永徽初大勃弄楊承顛私署將

帥寇麻州都督任懷玉招之不聽高宗以左領軍將軍
趙孝祖為郎州道行軍總管與懷玉討之至羅侯山其
酋長禿磨蒲與大鬼主都干以衆塞菁口孝祖大破之
夷人尚鬼謂主祭者為鬼主每歲戶出一牛或一羊就
其家祭之送鬼迎鬼必有兵因以復讎云孝祖按軍多
棄城逐北至周近水大酋儉彌干鬼主董朴瀕水為柵
以輕騎逆戰孝祖擊斬彌干禿磨蒲鬼主十餘級會大
雪戰凍死者略盡孝祖上言小勃弄大勃弄常誘弄棟

叛今因破白水請遂西討詔可孝祖軍入夷人皆走險
小勃弄酋長歿盛屯白旗城率萬騎戰敗斬之進至大
勃弄楊承顙嬰城守孝祖招之不從麾軍進執承顙餘
屯大者數萬小數千皆破降之西南夷遂定罷郎州都
督更置戎州都督爨弘達既死以爨歸王為南寧州都
督居石城襲殺東爨首領蓋騁及子蓋啟徙共範川有
兩爨大鬼主崇道者與弟日進日用居安寧城左聞章
仇兼瓊開步頭路築安寧城羣蠻震騷共殺築城使者

玄宗詔蒙歸義討之師次波州歸王及崇道兄弟千餘人泥首謝罪赦之俄而崇道殺日進及歸王歸王妻阿妣烏蠻女也走父部乞兵相仇於是諸蠻亂阿妣遣使詣歸義求殺夫者書聞詔以其子守隅為南寧州都督歸義以女妻之又以一女妻崇道子輔朝然崇道守隅相攻討不置阿妣訴歸義為興師營昆川崇道走黎州遂虜其族殺輔朝收其女崇道俄亦被殺諸蠻稍離弱閤羅鳳立召守隅并妻歸河睽不通中國阿妣自主其

部落歲入朝恩賞蕃厚閤羅鳳遣昆川城使楊牟利以
兵脅西爨徙戶二十餘萬於永昌城東爨以言語不通
多散依林谷得不徙自曲靖州石城升麻昆川南北至
龍和皆殘于兵日進等子孫居永昌城烏蠻種復振徙
居西爨故地與峯州為隣貞元中置都督府領羈縻州
十八烏蠻與南詔世昏姻其種分七部落一曰阿芋路
居曲州靖州故地二曰阿猛三曰夔山四曰暴蠻五曰
盧鹿蠻二部落分保竹子嶺六曰磨彌斂七曰勿鄧土

多牛馬無布帛男子髻髻女人被髮皆衣牛羊皮俗尚
巫鬼無拜跪之節其語四譯乃與中國通大部落有大
鬼主百家則置小鬼主勿鄧地方千里有邛部六姓一
姓白蠻也五姓烏蠻也又有初果五姓皆烏蠻也居邛
部臺登之間婦人衣黑繒其長曳地又有東欽蠻二姓
皆白蠻也居北谷婦人衣白繒長不過膝又有栗蠻二
姓雷蠻二姓夢蠻三姓散處黎嶺戎數州之鄙皆隸勿
鄧勿鄧南七十里有雨林部落有十低三姓阿屯三姓

虧望三姓隸焉其南有豐琶部落阿諾二姓隸焉雨林
地雖陁而諸部推為長號都大鬼主勿鄧豐琶雨林皆
謂之東蠻天寶中皆受封爵及南詔陷嵩州遂羈屬吐
蕃貞元中復通款以勿鄧大鬼主苴嵩兼邛部團練使
封長川郡公及死子直驃離幼以苴夢衝為大鬼主數
為吐蕃侵獵雨林都大鬼主苴那時遺韋臯書乞兵攻
吐蕃臯遣將劉朝彩出銅山道吳鳴鶴出清溪關道鄧
英俊出定蕃柵道進逼臺登城吐蕃退壁西貢川據高

為營直那時戰甚力分兵大破吐蕃青海臘城二節度
軍於北谷青海大兵馬使乞藏遮遮臘城兵馬使悉多
楊朱節度論東柴大將論結突梨等皆戰死執寵官四
十五人鎧仗一萬牛馬稱是進拔于葱柵乞藏遮遮尚
結贊子也以尸還其下曩貢節度蘇論百餘人行哭使
一人立尸左一人問之曰瘡痛乎曰然即傳藥曰食乎
曰然即進膳曰衣乎曰然即命裘又問歸乎曰然以馬
載尸而去詔封直那時為順政郡王直夢衝為懷化郡

王豐琶部落大鬼主驃傍為和義郡王給印章袍帶三
王皆入朝宴麟德殿賞賚加等歲給其部祿鹽衣綵黎
雋二州更就賜之以山阻多為盜侵亡失所賜臯令二
州為築館有賜約酋長自至授賜而遣之然苴夢衝內
附吐蕃斷南詔使路臯遣雋州總管蘇崕以兵二百召
夢衝至琵琶川聲其罪斬之披其族為六部以樣棄主
之及苴驃離長乃命為大鬼主驃傍年少驍敢數出兵
攻吐蕃吐蕃間道焚其居室部落亡所賜印章臯為請

復得印蠻蠻西有昆明蠻一曰昆彌以西洱河為境即
葉榆河也距京師九千里土歌濕宜杭稻人辨首左衽
與突厥同隨水草畜牧夏處高山冬入深谷尚戰死惡
病亡勝兵數萬武德中雋州治中吉偉使南寧因至其
國諭使入朝貢求內屬發兵戍守自是歲與牂柯使偕
來龍朔三年矩州刺史謝法成招慰比樓等七千戶內
附總章三年置祿州湯望州咸亨三年昆明十四姓率
戶二萬內附析其地為殷州總州敦州以安輯之殷州

居戎州西北總州居西南敦州居南遠不過五百餘里
近三百里其後又置盤麻等四十一州皆以首領為刺
史昆明東九百里即牂柯國也兵數出侵地數千里元
和八年上表請盡歸牂柯故地開成元年鬼主阿珮內
屬會昌中封其別帥為羅殿王世襲爵其後又封別帥
為滇王皆牂柯蠻也東距辰州二千四百里其南千五
百里即交州也無城郭土熱多霜雨稻粟再熟無徭役
戰乃屯聚刻木為契盜者倍三而償殺人者出牛馬三

十俗與東謝同首領亦姓謝氏至龍羽有兵三萬武德三年遣使者朝以其地為牂州拜龍羽刺史封夜郎郡公其北百五十里有別部曰兗州蠻勝兵二萬亦來朝貢以地為兗州開元中牂柯酋長元齊死孫嘉藝襲官封其後乃以趙氏為酋長二十五年趙君道來朝其裔有趙國珍天寶中戰有功閤羅鳳叛宰相楊國忠兼劔南節度使以國珍有方略授黔中都督屢敗南詔護五溪十餘年天下方亂其部獨寧終工部尚書貞元中官

其酋長趙主俗亦以衰朝貢不絕至十八年五遣使朝
元和二年詔黔南觀察使常以本道將為押領牂柯昆
明等使自是數遣使或朝正月訖開成不絕故事戎夷
朝貢將至都中官驛勞於郊既及館恩禮尤渥西爨之
南有東謝蠻居黔州西三百里南距守宮獠西連夷子
地方千里宜五穀為畬田歲一易之衆處山巢居汲流
以飲無賦稅刻木為契見貴人執鞭而拜賞有功者以
牛馬銅鼓犯小罪則杖大事殺之盜物者倍償昏姻以

牛酒為聘女歸夫家夫慙澁避之旬日乃出會聚擊銅鼓吹角俗椎髻韜以絳垂于後坐必蹲踞常帶刀劔男子服衫襖大口袴以帶斜繚右肩以螺殼虎豹獐狢犬羊皮為飾有謝氏世為酋長部落尊畏之其族不育女自以姓高不可以嫁人貞觀三年其酋元深入朝冠烏熊皮若注旄以金銀絡額被毛帔韋行滕著履中書侍郎顏師古因是上言昔周武王時遠國入朝太史次為王會篇今蠻夷入朝如元深冠服不同可寫為王會圖

詔可帝以地為應州即拜元深刺史隸黔州都督府又有南謝首領謝彊亦來朝以其地為莊州授彊刺史建中三年大酋長檢校蠻州長史資陽郡公宋鼎與諸謝朝賀德宗以其國小不許訴於黔中觀察使王礎以州接牂柯願隨牂柯朝賀礎奏牂蠻二州戶繁力彊為隣蕃所憚請許三年一朝詔從之元和中辰淑蠻酋張伯靖嫉本道督飲苛刻聚衆叛侵播費二州黔中經略使崔能荆南節度使嚴綬湖南觀察使柳公綽討之三歲

不能定伯靖上表請隸荆南乃降崔能內恨之更請調荆南湖南桂管軍為援約西原十洞兵皆出可以成功公卿議者皆以為便宰相李吉甫曰伯靖挾怨而叛壓以大兵而招之可不戰自定乃命能兵毋出獨詔嚴綬招伯靖率家屬詣江陵降授右威衛翊府中郎將東謝南有西趙蠻東距夷子西屬昆明南西洱河也山穴阻深莫知道里南北十八日行東西二十三日行戶萬餘俗與東謝同趙氏世為酋長夷子渠帥姓季氏與西趙

皆南蠻別種勝兵各萬人自古未嘗通中國黔州豪帥
田康諷之故貞觀中皆遣使入朝西趙首領趙首摩率
所部萬餘戶內附以其地為明州授首摩刺史松外蠻
尚數十百部大者五六百戶小者二三百凡數十姓趙
楊李董為貴族皆擅山川不能相君長有城郭文字頗
知陰陽歷數自夜郎滇池以西皆莊躋之裔有稻麥粟
豆絲麻薤蒜桃李以十二月為歲首布幅廣七寸正月
蠶生二月熟男子氍毹革為帔女衣絕布裙衫髻盤如髻

飯用竹筍搏而噉之烏杯貯羹如雞彘徒跣有舟無車

死則坎地殯舍左屋之三年乃葬以蠶蚌封棺父母喪

斬衰布衣不澡者四五年近者二三年為人所殺者子

以麻括髮墨面衣不緝居喪婚嫁不廢亦弗避同姓婿

不親迎富室娶妻納金銀牛羊酒女所齎亦如之有罪

者樹一長木擊鼓集衆其下彊盜殺之富者貫死燒屋

奪其田盜者倍九而償賊姦淫則彊族輸金銀請和而

棄其妻處女嫠婦不坐凡相殺必報力不能則其部助

攻之祭祀殺牛馬親聯畢會助以牛酒多至數百人貞
觀中雋州都督劉伯英上疏松外諸蠻率蹇附亟叛請
擊之西洱河天竺道可通也居數歲太宗以右武侯將
軍梁建方發蜀十二州兵進討酋帥雙舍拒戰敗走殺
獲十餘萬羣蠻震駭走保山谷建方諭降者七十餘部
戶十萬九千署首領蒙和為縣令餘衆感悅西洱河蠻
亦曰河蠻道繇郎州走三千里建方遣奇兵自雋州道
千五百里掩之其帥楊盛大駭欲遁去使者好語約降

乃遣首領十人納款軍門建方振旅還二十二年西洱
河大首領楊同外東洱河大首領楊欽松外首領蒙羽
皆入朝授官秩顯慶元年西洱河大首領楊棟附顯和
蠻大首領王羅祁郎昆梨盤四州大首領王伽衝率部
落四千人歸附入朝貢方物其後茂州西南築安戎城
絕吐蕃通蠻之道生羌為吐蕃鄉導攻拔之增兵以守
西洱河諸蠻皆臣吐蕃開元中首領始入朝授刺史會
南詔蒙歸義拔大和城乃北徙更羈制於浪穹詔浪穹

詔已破又徙雲南柘城黎州領羈縻奉上等州二十六
開元十七年又領羈縻夏梁卜貴等州三十一南路有
廓清道部落主三人娑鹽鬼主十人又有阿逼蠻分十
四部落一曰大龍池二曰小龍池三曰控四曰苴質五
曰烏拔六曰苴賃七曰感策水八曰戎列九曰娑狄十
曰石地十一曰羅公十二曰訛十三曰離旻十四曰里
漢黎邛二州之東又有凌蠻西有三王蠻盖祚都夷白
馬氏之遺種楊劉郝三姓世為長襲封王謂之三王部

落疊甍而居號稠舍歲稟節度府帛三千匹以訶南詔而南詔亦密賂之覘成都虛實每節度使至酋長來謁節度使多奏威惠所懷以罔天子也前謁必請於都押衙且聽命都押衙不令者輒諷其叛常倚三王部落求姑息至唐末益甚雅州西有通吐蕃道三曰夏陽曰夔松曰始陽皆諸蠻錯居凡部落四十六距州三百餘里之外有百坡當品嚴城中川鉗矣昌逼鉗井七部落四百餘里之外有羅巖當馬三井束鋒名耶鉗恭畫重羅

林籠羊林波林燒龍逢索古敢川驚川禍眉不燭十七
部落五百餘里之外有諾祚三恭布嵐欠馬論川讓川
遠南卑盧夔龍曜川金川東嘉梁西嘉梁十三部落六
百餘里之外有椎梅作重禍林金林邏蓬五部落皆羈
縻州也以首領襲刺史雋州新安城傍有六姓蠻一曰
蒙蠻二曰夷蠻三曰訛蠻四曰狼蠻餘勿鄧及白蠻也
戎州管內有馴騁浪三州大鬼主董嘉慶累世內附以
忠謹稱封歸義郡王貞元中狼蠻亦請內附補首領狼

沙為刺史然卒不出劍南西川節度使韋臯檄嘉慶兼
押狼蠻又有魯望等部落徙居戎州馬鞍山臯以其遠
邊徼戶給米二斛鹽五斤北又有浪稽蠻羅哥谷蠻東
有婆秋蠻烏皮蠻南有離東蠻鍋鉗蠻西有磨些蠻與
南詔越析相姻婭自浪稽以下古滇王哀牢雜種其地
與吐蕃接亦有姐羌古白馬氏之裔劍山當吐蕃大路
屬石門柳彊二鎮置戍守捉以招討使領五部落一曰
彌羌二曰鑠羌三曰胡叢其餘東欽磨些也又有夷望

鼓路西望安樂湯谷佛蠻虧野阿醯阿鶚鉦蠻林井阿
異十二鬼王皆隸雋州又有奉國直伽十一部落春秋
受賞於雋州然挾吐蕃為輕重每節度使至諸部獻馬
酋長衣虎皮餘皆紅髯束髮錦纈襖半臂既見請匹錦
斗酒折草招父祖魂以歸鄉里及還裹錦植馬上而去
又有顯養東魯諸蠻永徽三年與胡叢皆叛高宗以右
驍衛將軍曹繼叔為雋州道行軍總管戰斜山拔十餘
城斬首七百獲馬犂牛萬五千姚州境有永昌蠻居古

永昌郡地咸亨五年叛高宗以太子右衛副率梁積壽
為姚州道行軍總管討平之武后天授中遣御史裴懷
古招懷至長壽時大首領董期率部落二萬內屬其西
有撲子蠻趨悍以青娑羅為通身袴善用竹弓入林射
飛鼠無不中無食噐以蕉葉藉之人多長大負排持稍
而鬪又有望蠻者用木弓短箭鏃傳毒藥中者立死婦
人食乳酪肥白跣足青布為衫裳聯貫珂貝珠絡之髻
垂于後有夫者分兩髻羣蠻種類多不可記有黑齒金

齒銀齒三種見人以漆及鏤金銀飾齒寢食則去之直頂為髻青布為通袴有繡脚種刻踝至腓為文有繡面種生踰月涅黛於面有雕題種身面涅黛有穿鼻種以金鐐徑尺貫其鼻下垂過頤君長以絲係鐐人牽乃行其次以二花頭金釘貫鼻下出又有長髻種棟鋒種皆額前為長髻下過臍行以物舉之君長則二女在前共舉其髻乃行安南有生蠻林覩符部落大厯中置德化州戶一萬又以潘歸國部落置龍武州戶千五百詔安

南節度使綏定之貞元七年始以驩峯二州為都督府
驩在安南限重海與文單占婆接峯統羈縻州十八與
蜀蠻蠻接

南平獠東距智州南屬渝州西接南州北涪州戶四千
餘多瘴癘山有毒草沙虱蝮蛇人樓居梯而上名為干
欄婦人橫布二幅穿中貫其首號曰通裙美髮髻垂於
後竹筒三寸斜穿其耳貴者飾以珠璫俗女多男少婦
人任役婚法女先以貨求男貧者無以嫁則賣為婢男

子左衽露髮徒跣其王姓朱氏號劒荔王貞觀三年遣使內款以其地隸渝州有飛頭獠者頭欲飛周項有痕如縷妻子共守之及夜如病頭忽亡比旦還又有烏武獠地多瘴毒中者不能飲藥故自鑿齒有甯氏世為南平渠帥陳末以其帥猛力為寧越太守陳亡自以為與陳叔寶同日而生當代為天子乃不入朝隋兵阻瘴不能進猛力死子長真襲刺史及討林邑長真出兵攻其後又率部落數千從征遼東煬帝召為鴻臚卿授安撫

太守遣還又以其族人甯宣為合浦太守隋亂皆以地
附蕭銑長真部越兵攻丘和於交趾者也武德初以甯
越鬱林之地降自是交愛數州始通高祖授長真欽州
都督甯宣亦遣使請降未報而卒以其子純為廉州刺
史族人道明為南越州刺史六年長真獻大珠昆州刺
史沈遜融州刺史歐陽世普象州刺史秦元覽亦獻筒
布高祖以道遠勞人皆不受道明與高州首領馮暄談
殿據南越州反攻姜州甯純以兵援之八年長真陷封

山縣昌州刺史龐孝恭持擊暄等走之明年道明為州人所殺未幾長真死子據襲刺史馮暄談殿阻兵相掠羣臣請擊之太宗不許遣員外散騎常侍韋叔諧員外散騎侍郎李公淹持節宣諭暄等與溪洞首領皆降南方遂定大抵劔南諸獠武德貞觀間數寇暴州縣者不一巴州山獠王多馨叛梁州都督龐玉梟其首又破餘黨符陽白石二縣獠其後眉州獠反益州行臺郭行方大破之未幾又破洪雅二州獠俘男女五千口是歲益

州獠亦反都督竇軌請擊之太宗報曰獠依山險當拊以恩信脅之以兵威豈為人父母意耶貞觀七年東西玉洞獠反以右屯衛大將軍張士貴為龔州道行軍總管平之十二年巫州獠叛夔州都督齊善行擊破之俘男女三千餘口鈞州獠叛桂州都督張寶德討平之明州山獠又叛交州都督李道彥擊走之是歲巴洋集璧四州山獠叛攻巴州遣右武侯將軍上官懷仁破之于璧州虜男女萬餘明年遂平十四年羅竇諸獠叛以廣

州都督党仁弘為竇州道行軍總管擊之虜男女七千餘人太宗再伐高麗為船劒南諸獠皆半役雅邛眉三州獠不堪其擾相率叛詔發隴右峽兵二萬以茂州都督張士貴為雅州道行軍總管與右衛將軍梁建方平之高宗初琰州獠叛梓州都督謝萬歲兗州刺史謝法興黔州都督李孟嘗討之萬歲法興入洞詔慰遇害顯慶三年羅竇生獠酋領多胡桑率衆內附上元末納州獠叛寇故茂都掌二縣殺吏民焚解舍詔黔州都督發

兵擊之大厯二年桂州山獠叛陷州刺史李良遁去貞
元中嘉州綏山縣婆籠川生獠首領甫枳兄弟誘生蠻
為亂剽居人西川節度使韋臯斬之招其首領勇于等
出降或請增柵東凌界以守臯不從曰無戎而城害所
生也獠亦自是不擾境戎瀘間有葛獠居依山谷林菁
踰數百里俗喜叛州縣撫視不至必合黨數千人持排
而戰奉酋帥為王號曰婆能出入前後植旗大中末昌
瀘二州刺史貪沓以弱繒及羊彊獠市米麥一斛得直

不及半羣獠訴曰當為賊取死耳刺史召二小吏榜之
曰皆爾屬為之非吾過獠相視大笑遂叛立酋長始艾
為王踰梓潼所過焚剽刺史劉成師誘降其黨斬首領
七十餘人餘衆遁至東川節度使柳仲郢諭降之始艾
稽首請罪仲郢貫遣之成都西北二千餘里有附國盖
漢西南夷也其東部有嘉良夷無姓氏地縱八百里橫
四千五百里無城柵居川谷疊石為巢高十餘丈以高
下為差作狹戶自內以通上王酋帥以金飾首胷垂金

花徑三寸地高涼多風少雨宜小麥多白雉嘉良夷有
水廣三十步附國水廣五十步皆南流以韋為船附國
南有薄緣夷西接女國三濮者在雲南徼外千五百里
有文面濮俗鏤面以青涅之赤口濮裸身而折齒剗其
脣使赤黑焚濮山居如人以幅布為裙貫頭而繫之丈
夫衣穀皮多白蹄牛虎魄龍朔中遣使與千支弗磨臘
同朝貢

西原蠻居廣容之南邕桂之西有甯氏者相承為豪又

有黃氏居黃橙洞其隸也其地西接南詔天寶初黃氏
彊與韋氏周氏儂氏相脣齒為寇害據十餘州韋氏周
氏恥不肯附黃氏攻之逐于海濱至德初首領黃乾曜
真崇鬱與陸州武陽朱蘭洞蠻皆叛推武承斐韋敬簡
為帥僭號中越王廖殷為桂南王莫淳為拓南王相支
為南越王梁奉為鎮南王羅誠為戎城王莫濬為南海
王合衆二十萬縣地數千里署置官吏攻桂管十八州
所至焚廬舍掠士女更四歲不能平乾元初遣中使慰

曉諸首領賜詔書赦其罪約降於是西原環古等州首
領方子彈甘令暉羅承韋張九解宋原五百餘人請出
兵討承斐等歲中戰二百斬黃乾曜真鬱崇廖殿莫淳
梁奉羅誠莫潯七人承斐等以餘衆面縛詣桂州降盡
釋其縛差賜布帛縱之其種落張侯夏永與夷獠梁崇
牽覃問及西原酋長吳功曹復合兵內寇陷道州據城
五十餘日桂管經略使邢濟擊平之執吳功曹等餘衆
復圍道州刺史元結固守不能下進攻永州陷邵州留

數日而去湖南團練使辛京杲遣將王國良戍武崗嫉京杲貪暴亦叛有衆千人侵掠州縣發使招之且服且叛建中元年城淑州以斷西原國良乃降貞元十年黃洞首領黃少卿者攻邕管圍經略使孫公器請發嶺南兵窮討之德宗不許命中人招諭不從俄陷欽橫潯貴四州少卿子昌沔趨舅前後陷十三州氣益振乃以唐州刺史陽旻為容管招討經略使引師掩賊一日六七戰皆破之侵地悉復元和初邕州擒其別帥黃承慶明

年少卿等歸款拜歸順州刺史弟少高為有州刺史未
幾復叛又有黃少度黃昌驩二部陷賓蠻二州據之十
一年攻欽橫二州邕管經略使韋悅破走之取賓蠻二
州是歲復屠巖州桂管觀察使裴行立輕其軍弱首請
發兵盡誅叛者徼幸有功憲宗許之行立兵出擊彌更
二歲妄奏斬獲二萬罔天子為解自是邕容兩道殺傷
疾疫死者十八以上調費鬪亡繇行立陽旻二人當時
莫不咎之及安南兵亂殺都護李象古擢唐州刺史桂

仲武為都護逗留不敢進貶安州刺史以行立代之尋
召還卒長慶初以容管經略使留後嚴公素為經略使
復上表請討黃氏兵部侍郎韓愈建言黃賊皆洞獠無
城郭依山險各治生業急則屯聚畏死前日邕管經略
使德不能綏懷威不能臨制侵詐係縛以致憾恨夷性
易動而難安邛州縣復私讐貪小利不為大患自行立
陽旻建征討生事詭賞邕容兩管日以凋敝殺傷疾患
十室九空百姓怨嗟如出一口人神共嫉二將繼死今

嚴公素非撫御之才復尋往謬誠恐嶺南未有寧時昨
合邕容為一道邕與賊限一江若經略使居之兵鎮所
處物力雄完則敵人不敵輕犯容州則隔阻已甚以經
略使居之則邕州兵少情見易啟蠻心請以經略使還
邕州容置刺史便甚又比發南兵遠鄉羈旅疾疫殺傷
續添續死每發倍難若募邕容千人以給行營糧不增
而兵便習守則有威攻則有利自南討損傷嶺南人希
賊之所處洞壘荒僻假如盡殺其人得其地在國計不

為有益容貸羈縻比之禽獸來則捍禦去則不追未有
虧損朝廷願因改元大慶普赦其罪遣郎官御史以天
子意丁寧宣諭必能謹叫聽命為選材用威信者委以
經略處理得方宜無侵叛事不納初邕管既廢人不謂
宜監察御史杜周士使安南過邕州刺史李元宗白狀
周士從事五管積三十年矣亦知其不便嚴公素遣人
盜其橐周士憤死公素劾元宗擅以羅陽縣還黃少度
元宗懼引兵一百持印章依少度穆宗遣監察御史敬

僚按之僚嘗為容州從事與公素暱傳致元宗罪以母
老流驩州衆以為不直黃賊更攻邕州陷左江鎮攻欽
州陷千金鎮刺史楊嶼奔石南柵邕州刺史崔結擊破
之明年又寇欽州殺將吏是歲黃昌瓚遣其黨陳少奇
二十人歸款請降敬宗納之黃氏儂氏據州十八經畧
使至遣一人詣治所稍不得意輒侵掠諸州橫州當邕
江官道嶺南節度使常以兵五百戍守不能制大和中
經畧使董昌齡遣子蘭討平峒穴夷其種黨諸蠻畏服

有違命者必嚴罰之十八州歲輸貢賦道路清平其後
儂洞最彊結南詔為助懿宗與南詔約和二洞數構敗
之邕管節度使辛儼以從事徐雲虔使南詔結和齊美
貨啖二洞首領太州刺史黃伯蘊屯洞首領儂金意員
州首領儂金勒等與之通驩員州又有首領儂金澄儂
仲武與金勒襲黃洞首領黃伯善伯善伏兵灤水雞鳴
候其半濟擊殺金澄仲武唯金勒遁免後欲興兵報仇
辛儼遣人持牛酒音樂解和并遺其母衣服母賢者也

讓其子曰節度使持物與獠毋非結好也以汝為吾子
前日兵敗讓水土卒略盡不自悔復欲動衆兵忿者必
敗吾將因為官老婢矣金勒感悟為罷兵

贊曰唐北禽頡利西滅高昌焉者東破高麗百濟威制
夷狄方策所未有也交州漢之故封其外瀕海諸蠻無
廣土堅城可以居守故中國兵未嘗至及唐稍弱西原
黃洞繼為邊害垂百餘年及其亡也以南詔詩曰惠此
中國以綏四方不以夷狄先諸夏也

唐書卷一百二十二下

謹案卷二百二十二上第二頁前一行厥爽主工
作刊本作訛館據通鑑僖宗乾符二年胡三省
注改

第九頁前八行異牟尋願竭誠自新刊本自訛日
據文獻通考改


卷二百二十二中第五頁後八行即挺其繫案挺
字應是釋字之訛

卷二百二十二下第一頁後六行則合掌頓顙刊

本掌訛爪據舊書林邑傳改

第二十八頁後三行自是數遣使刊本脫遣字據

監本毛本增



總校官庶吉士臣侍朝

校對官庶吉士臣嚴福

謄錄監生臣施昌華